

Regional News Unit AIR Aizawl

Date – 26/08/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Commerce and Industries Minister Pu F. Rodinglana'n eizawna atana sorkara inngat lo thangthar, thiam thil ngah leh taima tak tak Mizoramin a nei chho zel a ti.
2. Aizawl Municipal Corporation Ward parukna By-Election-ah ZPM candidate Pu H. Lalremtuanga thlan tlin a ni.
3. Aam Aadmi Party Mizoram chuan Mizoram-in raltlan chungchangah policy mumal tak a neih a tul an ti.
4. Syria rama Mizo hmeichhe pathum, hna thawka awm harsatna tawkte chu an hrui haw hnuah Aizawl an thlenpui vek tawh thu Mizoram Police ten an sawi.



MINISTER INAUGURATE UNNATI SCHEME

Commerce and Industries Minister Pu F. Rodinglana'n eizawna atana sorkara inngat lo thangthar, thiam thil ngah leh taima tak tak Mizoramin a nei chho zel chu lawmawm a tih thu a sawi.

India hmarchhak state-ahte industry hmanga sum leh paia hmasawna chak zawk a thlen theih nana hmalakna UNNATI 2024, Mizoram tana a tlangzarhna Aijal Club-ah he thu hi a sawi a. Minister chuan Mizoram sorkarin Handholding Policy a kalpui mek leh tun hnai lawka Strategic Investment Plan hnuai MSME Elevate Mizoram Scheme a siam leh hmalakna dangte nen a remchan dan ang zela inzarzawmin, industry neitute tan hmasawna tha tak a thlen a beisei thu a sawi baw.

Tun hma lamah Mizorama industry neitute zingah an eizawna bul tan leh tihhmasawna tur loan an puk te a nih tur anga hmang lo te, rul tha lo te an lo awm thin thu leh chu chuan industry thanna tur a tihthuanawp thu Minister chuan a sawi a. Tun hnuah chuan hmasawna hlawhtling tak tak duhte tan sorkar chuan theihtawp a chhuah tur thu sawiin Handholding Policy hmanga industry tihhmasawn a nih dan tur te a sawifiah a. Sorkar hna chu ‘public service’ a nih anga ‘Bana Kaih Policy’ leh ruahmanna dang dangte chu a tangkai thei ang bera chhawr a nih theih nan sorkar hotute pawh inhawng taka kalpui turin a chah bawk.



ZPM WON AMC BY-ELECTION

Aizawl Municipal Corporation (AMC) hnuaiia Ward parukna By-Election-a vote tla te vawiin khan chhiar a ni a. Zoram People’s Movement (ZPM) candidate Pu H. Lalremtuanga chu thlan tlin a ni a; Returning Officer Pu Mark Lalthanliana’n Certificate a hlan nghal.

Pu H. Lalremtuanga hian vote 2,354 a hmu a, amah hnaih bertu Independent candidate, party pahnih MNF leh Congress ten an thlawp Pi Lalrinfeli chuan vote 2,273 a hmu thung a, an inthlauhna hi vote 81 a ni. BJP aiawha ding Pu Chawngmingthanga chuan vote 33 a hmu.

Puan tawh thin angin AMC Ward parukna hian Chanmari West, Edenthlar leh Hunthar Veng te a huam a. Polling Station 10 awmin vote nei 9,901 an awm a. August ni 22 khan inthlan vote thlakin, vote 4,691 a tla a a, hei hi za zela 47.38 a ni.

AMC Ward parukna Corporator ni lai Pu John Zosangliana Ralte a thih vangin seat ruak hnawhkhat tur hian By-Election hi buatsaih a ni.



AAP PRESS CONFERENCE

Aam Aadmi Party (AAP) Mizoram hruaitute’n raltlan chungchangah Mizoram-in policy mumal tak a neih a tul nia an hriat thu an sawi.

Vawiina Aizawl Press Club-a chanchinbu mite an kawmnaah he thu hi sawiin AAP Mizoram hruaitute chuan, ZPM sorkar chu raltlan chungchanga hma la tawh lo nia an ngaih thu an sawi a, opposition-an nih laia raltlan chungchanga hmalakna neih an tum te a taka lantir a hun tawh

thu sawiin, raltlan record pawh fel taka neih a la nih loh thu an sawi a, raltlan chungchangah policy fel fai tak siam a tul tawh takzet, an ti.

AAP hruaitute chuan Manipur-a buaina thleng chungchangah, BJP kaihhruai sorkar laipui leh Manipur sorkar chu an tel ngei thu sawiin hemi avang hian Manipur Chief Minister tawngkam chhuak reng reng chu Meitei-te fuihpawrh zawng hliir a ni, an ti a. Manipur buaina chungchanga Prime Minister-in tawngka chhuak a la nei lo chu mak an tih thu leh Manipur-a BJP-te chet duh dan enin Mizoram tan BJP an tha ber tia lo sawitute chu an inen chian hle a ngaih thu an sawi bawk.



CHAMPHAI MHIP

Sub-Headquarters MHIP, Champhai hruaituten nimina Pi Tha-hlei-iangi kum 54, Champhai Vengthar, Tlangnuam ami, misual kut tuara a thih chungchangah Champhai Police Station leh District Child Protection office a thuneitute vawiin khan hmuin tualthahna thleng vanga an lungawi loh thu te, Champhai Police ten rang taka pawikhawihtu an man avanga an lawmthute hrilhin, tualthattua puh hi a pawikhawih nasat dan thlirin kum tling lo a nih an rin loh thu te an hrilh a; a kum zat dik tak tichiang tur leh a tulna apianga thuneitute puihbawm an inhuam thute an hrilh a; tualthattua puhin a pawi khawih phu tawka hremna a chungha lekkawh ngei an duhthu te an hrilh a ni.

Champhai Police Station an tlawh lai hian Thana OC, Case IO ni bawk a lo awm lova, pawikhawihtu chinchang mumal takin an hre thei lova, tualthattua puh chu Aizawlah thawn thlak a nih thu erawh Police-te hian an lo hrilh a ni.

MHIP hruaitute hian District Child Protection Officer office, Dawrkaikawna mi pawh tlawh nghalin, Pi R.Lalrinchhani, District Child protection officer-in a lo dawngsawng a, tualthattua puh chu Champhai District Juvenile Justice Board kuta a awm thu leh a chungthu an rel zui dawn thu a lo hrilh a. MHIP hruaituten an hmeichhiatpui thlavang hauha an hmalakna chu fakawm a tih thu sawiin, pawikhawihtu chu a thiltih sual phu tawka hrem a nih ngei theih nana tan la sauh sauh turin MHIP hruaitute chu a lo fuih a. Pawikhawihtu kum tihchian a nih theih nan a tul anga thawhpui atan a lo sawm bawk a ni.



MIZORAM POLICE RESCUES THREE PERSONS FROM SYRIA

Syria rama Mizo hmeichhe pathum, hna thawka awm harsatna tawkte chu an hruai haw hnuah Aizawl an thlenpui vek tawh thu Mizoram Police ten an sawi.

Mizoram Police hotute sawi dan chuan hmeichhe pathum Syria rama harsatna tawkte hi kum 2022 November ni 6 khan hna thawk turin Syria ram an thleng a; harsatna an tawh tak avangin hian hruai chhuak turin Mizoram Police hnuai CID Special Branch-te chuan thla li lai an buaipui thu leh an vai hian tun thla ni 22 khan Mizoram rawn thlenpui an nih bakah Aizawla hmun pakhat awmtir rih an nih thu te an sawi a, tun kar chho hian an khaw lamah theuh an haw dawn thu an sawi.

Police hotute chuan Syria chu rambuai a nih avangin official-a thil bawhzui a harsat hle thu an sawi a, an ngen anga Syria, Damascus-a Indian Embassy te'n an lo buaipui thu leh, Mizo hmeichhe pathum te leh anmahni ruaitute chu Syrian Court-a an inkhin thu te leh Mizo hmeichhe pathum ten thiam an chan thu te, Exit Visa te buaipui fel a nih hnuah tun thla ni 20-a Syria an chhuahsan thu leh hemi ni veka India ram an rawn thlen thu te an sawi a. Mizo hmeichhe pathum te chu E&K Agency, Vaivakawn kaltlanga Dubai-a hnathawk tura thawn an nih thu te, thla li dawn hnathawh tur an hmuh loh avanga anmahni enkawltu Dubai-a Agency ten an duh lo chung Iraq-ah thawn an tum thu leh, chumi lama kal tura ngaih an nih laiin Syria-ah tirh an nih thu an sawi baw.

Syria rama harsatna taw, Mizo hmeichhe pathumte hi mi inah awmin awmpui hna an thawk a, in pakhat mai ni lo, in hrang hrangah hnathawka tirh kual thin an ni a. Anmahni chhawrtute chuan zing hma tak atanga chhawr tanin zan lamah pawh hun rei lote bak mutna hun an pek loh bakah ei tur mumal pawh an pek ngai loh thu an sawi.



LAWNGTLAI – FATAL CURRENT SHOCK

Vawiin chawhnu khan Lawngtlai District, Parva-1 ami Punyo Joy Chakma, kum 19 chu Current man vangin a thi.

Parva atanga Lawngtlaia kan corr. thu dawn dan chuan hun rei tak Parva leh a chhehvelin Kawlphetha an neih loh hnuah tunhnai khan Kawlphetha hi an dawng a, Parva-I lam eng pekna hrui chhia en fel ngai a awm vangin Punyo Joy Chakma, P&E Department-a Muster Roll-a thawk chu hrui tla fual enfel turin a kal a, siam tha tura hrui a khawihah chuan Kawlphetha lo kalin hei hian a man a, a thih pah ta a ni.

Punyo Joy Chakma hian a nupui leh a fa kum 2 mi a kalsan a. Kristian niin, a awmna Kohhran Presbyterian Kohhranah Sunday School Secretary ni lai a ni.



MAMIT DC

Tun hnai ruahsur nasa vanga chhiatna thlenna hmun Mamit leh Dârlak inkar Tuidai thlanga leimin leh Mamit leh Dapchhuah inkar kawngte a hmunah Mamit District Disaster Management Authority Chairman, Bawrhsap Pu Jacob Lalawmpuia'n vawiin khan a tlawh.

Mamit Bawrhsap chuan kumin fur ruahtui a tam avangin Mamit District chhung inkalpawhna hrang hrangah lirthei veivak leh mipui te'n harsatna an tawh nasat thu sawiin chhiatna nasa zawk a thlen loh nana invenna a theih ang anga kalpui tum a nih thu a sawi a. Mamit leh Darlak inkar kawnga leimin avanga harsatna tawh mek chu PWD thuneitute'n a theih ang anga hna an thawh mek thu leh leimin avangin inkalpawhna kawngpui min tel mai thei dinhmuna a din avangin kawng hlui, Mausem kawng lam chu engemaw thut a awm pawha zawh theih tura then fai a nih dawn thu a sawi a. Mamit leh Dapchhuah inkar kawng, fur ruahtui avanga chhe thin chungchangah pawh hmalak zel dan tur ngaihtuah a nih tur thu a sawi a.

Darlak leh Tuidam inkar kawng pawh a theih ang anga thuamthat a ni chungin awmzia a neih hleihtheih rih loh thu leh kawng thar zawka leimin chu paih faia lirthei kal theih tura ruahman mek a nih thu a sawi bawk.

Mamit leh Darlak inkar Tuidai thlang leimin hian kawngpui khi a siam nasa hle a,kawngpui khi hi a theih anga cement hmanga char niin, leiminin kawng a hnawh hi thenfai nghal a ni.

